



16
2580
1







門 16
2580
1

16
2580
1-2

拾 衣
肆 肆

光緒十六年
五月刊成

自敘

余少喜讀文選尤愛李氏注該博足資攷證嘗採集諸書以證發李注之有疑義者而辨證諸說之糾紛者爲文選質疑一書既成計十餘萬言懼其語之詳而未擇之精也且時頻遭兵燹剝削殊難是以刪之又刪損之又損取其有裨於李注而足證諸家之疎舛者錄之爲八卷嗚呼此於文選誠萬分而得其一端然而不忍自棄者業雖不專於此蓋十餘年矣時抱病方篤編既成序其本末如此命曰拾遺云爾咸豐八年仲春番禺朱銘元譔甫序

是編引用書籍三百餘種家藏外半出假借今已刪去大抵十不存三然師友相資不可忘其所自茲因其先後誌

之趙毅卿師元浩張孝廉杓丁中書熙梁上舍培丁孝廉
杰徐君灝麥君銓丁訓導照至於參訂之功則陳廣文澧
與丁徐諸君並有力焉銘再識

文選拾遺卷一

兩都賦序

番禺朱銘學



神雀五鳳注

應劭曰前年神雀集長樂宮故改年也 宋吳

仁傑兩漢刊誤補遺云案郊祀志明言帝幸河東祠后土

有神爵集故改元為神雀劭乃舉前年長樂宮事非是紀

載改年之詔曰其以五年為神爵元年又云神爵仍集謂

二年集雍三年集泰山四年集長樂也凡稱注皆據鄒陽

注

胡氏影宋本李善

西都賦

七相五公注

漢書韋賢為丞相徙平陵車千秋為丞相徙長

陵黃霸爲丞相徙平陵平當爲丞相徙平陵魏相爲丞相
徙平陵公御史大夫將軍通稱也漢書曰張湯爲御史大
夫徙杜陵杜周爲御史大夫徙茂陵蕭望之爲前將軍徙
杜陵馮奉世爲右將軍徙杜陵史丹爲大將軍案丹爲左
右將軍未
嘗爲大將軍
表傳並同徙杜陵 案注七相共五人餘二人無注或
疑並數韋賢子元成平當子晏非也若然則下注五公不
當舉五人張湯之子安世曾爲大司馬史丹之父高亦曾
爲大司馬而注不並數可證也漢書百官公卿表云孝元
建元六年田蚡爲丞相本傳云
生長陵孝武建始四年王商爲丞
相本傳云
徙杜陵章懷後漢注補入王商而列田蚡於五公亦未
合據此可足七人之數又案漢書百官公卿表御史大夫

司徒司馬司空皆位三公將軍得通稱公者續漢書百官
志云將軍不常置比公者四第一大將軍次驃騎將軍次
車騎將軍次衛將軍而左右前後將軍不在比公之列漢
書首列三公其將軍不冠大司馬者列第四等則將軍在
三公之下明矣孝宣神爵元年蕭望之爲御史大夫孝武
元光元年張歐爲御史大夫本傳家
陽陵孝宣黃龍元年史高
爲大司馬車騎將軍當去馮奉世史丹以此補之又李注
七相云其餘不在七相之數者並以罪國除故也案張湯
於元狩六年有罪自殺亦當去張湯以其子安世補之表
云孝宣地節元年張安世爲大司馬車騎將軍章懷注不
數張湯而七相旣舉韋賢五公又復舉韋賢亦非也

蓋以強幹弱枝注春秋漢含孳曰強幹弱流天之道 尚書

大傳鮮誓曰強幹弱枝尊天子卑諸侯也

神池靈沼注毛詩曰王在靈沼 三輔黃圖引三秦記云昆

明池中有靈沼名神池

重軒三階注王逸楚辭注曰軒樓版也 楚辭招魂曰紅壁

沙版王逸注云以丹沙畫飾軒版案軒版即樓版也爾雅

云屋上薄謂之筮郭注云屋簷也說文云簷迫也在瓦之

下笄上戴氏東原考工記圖云重屋複屋也別設棟以列

椽其椽謂之笄椽棟既重軒版垂檐皆重矣軒版即屋簷

而他書所稱曰重檐曰重椽曰重軒曰重棟曰重笄各舉

其一為言爾重屋形制累複是以或謂之閣亦得云樓薛

綜注西京賦以為闌板亦誤

張鳳蓋注桓子新論曰乘車當作玉爪華芝及鳳凰三蓋之

屬 案注所引皆車制與賦言龍舟未合黃圖云昆明池

中有龍首船張鳳蓋建華旗注云綉鳳為飾

東都賦

作舟輿注周易曰黃帝堯舜氏剡木為舟剡木為楫 續漢

書輿服志注引古史考曰黃帝作車引重致遠其後少昊

時駕牛禹時奚仲駕馬

遷都改邑有殷宗中興之則焉注尚書曰盤庚遷於殷謂盤

庚為宗班之誤歟 班固漢書宣帝紀贊曰可謂中興德

侔殷宗周宣矣師古曰殷高宗及周宣王也則此賦殷宗

乃謂武丁攷武丁無遷都事閻氏四書釋地云朝歌本妹
邑或曰武丁始都者然則武丁蓋曾遷都

同符乎高祖注孟子曰舜文王相去千有餘歲若合符節也

惠氏棟後漢書補注云東觀漢紀曰馬援曰天下反覆

自盜名字者不可勝數今見陛下恢廓大度同符高祖

天官景從注蔡雍獨斷百官小吏曰天官 案注官當作家

今本獨斷云天子自謂曰行在所親近侍從官稱曰大家

百官小吏稱曰天家又云天王諸夏之所稱天子夷狄之

所稱天家百官小吏之所稱天子無外以天下為家故稱

天家李注引此釋天官者以謂天家之百官也

僭侏兜離注孝經鉤命決曰東夷之樂曰侏南夷之樂曰任

西夷之樂曰林離北夷之樂曰僭 注林當作株亦作侏

並與兜同章懷注云西方曰侏離兜作侏也惠氏棟後漢

書補注云兜離即侏離古聲兜侏相近是也白虎通禮樂

篇引樂元語云南夷之樂曰兜東夷之樂曰離說者遂據

以證賦文分兜離為二樂案樂元語下文又釋其義云南

之為言任也任養萬物侏離者萬物微離地而生以上下

文義證之則兜當作南離上當有侏字或作兜離禮記明

堂位正義引樂元語曰東夷之樂曰朝離南夷之樂曰南

朝侏兜並聲相近則今本白虎通自為舛誤不足據矣

辟雍詩

於赫太上注如淳曰太上天子也 春秋隱公三年三月庚

戊天王崩穀梁傳曰其不名何也大上故不名也注云居人之大在民之上故無所名後漢注太上謂太古立德賢聖之人非是

西京賦

岐梁汧雍注漢書汧山在扶風汧縣西 漢書地理志右扶

風有雍縣應劭曰四面積高曰雍

陳寶雞鳴在焉注應劭曰時以寶瑞作陳寶祠在陳倉故曰

陳寶 索隱引列異傳云陳倉人得物以獻之道遇二童

子云此名爲媚在地下食死人腦媚乃言云彼童子名陳

寶得雄者王雌者霸乃逐童子化爲雉秦穆公大獵果獲

其雌爲立祠祭又秦本紀云文公十九年得陳寶則是本

名陳寶非因陳倉而云然也

寔惟地之奧區神臯注神臯接神之聲善曰廣雅曰臯局也

謂神明之界局也 案聲字各本皆同儀禮士喪禮鄭注

云臯長聲則臯可訓爲聲然區臯皆以地言本文自明李

注爲長

表曉闕於閭闔注宮門立闕以爲表 三輔黃圖引漢宮殿

疏曰未央宮有元武蒼龍二闕

負筍業而餘怒注當筍下爲兩飛獸以背負又以板置上名

爲業 周禮冬官梓人職云羸者羽者鱗者以爲奠虞又

云攫網援箬之類必深其爪出其目作其鱗之而則於眦

必撥爾而怒苟撥爾而怒則於任重宜

重以虎威章溝嚴更之署注虎威章溝未聞其意 黃圖云

虎威章溝皆署名漢有長水中壘屯騎虎賁越騎步兵射
聲胡騎八營宿衛王宮周廬直宿處據此八營皆於虎威
章溝二署直宿說者或誤以八營為衛尉八屯遂疑長水
中壘等不屬衛尉然八營八屯本為二事宜其不合矣說
詳下文

衛尉八屯注衛尉帥吏士周宮外於四方四角立八屯士

後漢書百官志衛尉之屬有公車司馬令一人公車司馬
有丞尉各一人尉主闕門兵劉昭注引胡廣曰諸門部各
陳屯夾道其旁當兵以示威武交戟以遮妄出入者此一
屯也在闕門志又云宮掖每門司馬一人本注曰南宮南

屯司馬主平城門北宮門蒼龍司馬主東門元武司馬主
元武門北屯司馬主北門北宮朱雀司馬主南掖門東明
司馬主東門朔平司馬主北門凡七屯與公車司馬共為
八屯而屬八司馬也或疑後漢志所載為東京之制案漢
書百官公卿表衛尉屬官有公車司馬諸屯衛候司馬皆
屬焉此足明證為西京之制矣八營與八屯異諸注釋者
皆混而不析

況青鳥與黃雀注杜預曰青鳥鷦鷯也 案昭十七年左傳

杜注鷦鷯也此作鷦誤寰宇記引雲陽記云鈞弋夫人至
甘泉而卒武帝思之為起通靈臺於甘泉宮有一青鳥集
臺上往來至宣帝時乃止此賦正借用其事又御覽禮儀

部引禮稽命微曰天子祭天地宗廟得其宜則青鳥黃雀集

閭闔之內別風嶢嶢注閭闔已見上文案上文表嶢闕於

閭闔乃未央宮門非建章宮也黃圖云建章宮之正門曰

閭闔高二十五丈門內北起別風闕高五十丈又引廟記

云嶢嶢闕在圓闕門內二百步

武庫禁兵設在蘭綺注綺架也武庫天子主兵器之官善曰

劉逵魏都賦注曰受他兵曰蘭受弩曰綺音蟻黃圖云

武庫在未央宮蕭何造以藏兵器左氏宣十二年傳脫局

釋文云局車上兵闌案此謂車上插戈矛者蘭與闌同漢

書王莽傳云與牛馬同蘭師古曰蘭謂遮蘭之若牛馬蘭

圈也說文曰綺鉏鉏也鉏同鋸繫傳曰鉏鉏猶犬牙也然

則綺蓋以木為犬牙形層級以承弓弩也

今也惟尉注漢書曰京兆尹長安四市皆屬焉然市有長丞

而無尉蓋通呼長丞為尉耳黃圖云有令署以察商賈

貨財買賣貿易之事三輔都尉掌之又云三輔郡皆有都

尉如諸郡

東至鼎湖陂界細柳注皆地名也案此鼎湖及下長楊五

柞皆宮觀名黃圖云鼎湖宮在湖城縣界細柳觀在長安

西北

木則樅栝椶柎注郭璞曰柎木似水楊案郭璞山海經注

云柎大木葉似桑陸機毛詩疏云柎葉大可三四葉一藜

木理細緻于豫章

薇蕨荔芄

注

爾雅曰芄東蠹郭璞曰未詳

郝氏懿行爾雅

義疏曰本草蠹實別錄一名荔實又名劇荔管子地員篇

云其種大荔細荔說文曰荔似蒲而小根可為淑蘇頌圖

經曰蠹實馬棟子也葉似薤而長厚人取以為淑疑即爾

雅芄東蠹也集韻云芄草名葉似蒲叢生銘案如郝說荔

即芄也然以此賦證之則荔芄不當合并為一據管子有

大荔細荔說文云荔似蒲而小則荔為細荔馬棟為大荔

即芄也釋爾雅者當據此賦分別言之

迺有昆明靈沼黑水玄阯

注

水色黑故曰玄阯也

楚詞天

問曰黑水玄阯三危安在黃圖曰武帝初穿池得黑土帝

問東方朔東方朔曰西域胡人知乃問胡人胡人曰劫燒之餘灰也

弧旌枉矢

注

弧星名

案枉矢亦星名漢書天文志云枉矢

狀類大流星蛇行而倉黑望如有毛目然是也續漢書輿

服志注引鄭元曰旌旗之屬皆有弧也弧以張繆之幅又

為設矢象弧星有矢也析羽為旌

禁御不若

注

左氏傳曰不逢不若

惠氏棟左傳補注云爾

雅釋詁云若善也郭景純注引左傳曰禁御不若今左傳

作不逢不若晉以後傳寫之譌

東京賦

楚築章華於前

注

左氏傳曰楚子成章華之臺於乾谿

沈

括夢溪筆談云楚章華臺亳州城父縣陳州商水縣荊州江陵監利縣皆有之據左傳楚靈王十七年成章華之臺與諸侯落之杜預注章華在華容城中華容即今之監利縣非岳州之華容也至今有章華故臺在縣郭中與杜預之說相符薛綜注乃云楚子成章華之臺於乾谿左傳實無此文

趙建叢臺於後注史記曰趙武靈王起叢臺太子圍之三月於後在六國之時 史記趙世家云武靈王十七年出九門為野臺以望齊中山之境別無靈王起叢臺事徐廣謂九門在常山野一作望司馬彪郡國志常山國九門縣不載野臺劉昭注引趙國邯鄲縣云有叢臺則與野臺所在

異地說者或混而一之非也水經濁漳注亦謂叢臺在邯鄲六國時趙王之臺也

紀禪肅然之功注肅敬也謂登封泰山升禪肅然 顧氏炎武山東考古錄曰史記武帝禪泰山下趾東北肅然山注服虔云肅然山在梁父案梁父縣在今兗州府泗水縣境是泰山之南與本文東北不合今泰安州東關往北七十里地名王許保其北有碑云古宿巖山恐即肅然也

西阻九阿注穆天子傳曰天子西升九阿 案穆天子傳郭璞注云疑今西安縣十里九坂也御覽地部引述征記曰黃卷坂者傍絕澗以昇潼關長坂十餘里九坂皆迤邐長坂東京賦所謂西阻九阿是也戴延之西征記曰黃坂去

終南六十里少華山西

建象魏之兩觀注象魏闕也 水經注引漢官典職曰偃師

去洛四續漢志引十五里望朱雀闕其上鬱然與天連

於東則洪池清灊注洪池名也應劭曰灊在池水上作室可

用棲鳥鳥入則捕之 水經注云穀水又東注鴻池陂百

官志曰鴻池在洛陽二十里漢書宣紀注蘇林曰折竹以

繩絲連禁御使人不得往來律名為禦此注應劭當依漢

書注作服虔洪下亦當重池字

龍輅充庭雲旗拂霓注充滿也庭朝廷霓天邊氣也 案宋

書禮志云舊有充庭之制臨軒大會陳乘輿車輦旌鼓於

殿庭引此賦為證爾雅曰霓為挈貳郭注云雙色出鮮盛

者為雄曰虹闇者為雌曰霓說文曰霓屈虹也

是時稱警蹕注警謂清道也 周禮大司寇職云凡邦之大

事使其屬蹕鄭注云謂蹕止行也衛宏漢官舊儀曰輦動

則左右侍帷幄者稱警出殿則傳蹕止人清道古今注云

周禮蹕而不警秦制出警入蹕

方鉉左纛注方鉉謂轅旁以五寸鐵鏤錫段曰此中央低兩

頭高如山形而貫中以翟尾結著之轅兩邊恐馬相突也

續漢志劉昭引此注無謂轅旁句及轅兩邊以下十七

字說文曰棨輿馬頭上防鉉插以翟尾鐵翮句象角句所

以防网羅鉉去之段注云蔡邕獨斷曰方鉉鐵也廣數寸

在馬騶後有三孔插翟尾其中薛解西京賦謂結著之轅

兩邊蔡云在馬髦後正負轅之處然許云以防网羅室礙則應在馬頭上銘案宋志云金爲义髦隋志云方鉉當顛蓋馬冠也皆不謂在轅旁蓋鉉在馬頭上如戴兩角之形此許云象角者也

雲罕九游

注

雲罕旌旗之別名也九旂亦旗名也

宋書禮

志曰案魏命晉王建天子旌旗置旌頭雲罕是知雲罕非旌旗也潘岳籍田賦以其物匹鈹戟宜是今罕網明矣文獻通考云罕罕皆赤質金銅飾朱籐結網金獸面罕方上有二螭首銜紅絲拂罕圓如扇

總輕武於後陳

注

後陳者謂北軍五營兵在後陳列

續漢

志云輕車古之戰車也不巾不蓋建矛戟大駕出射聲校

尉司馬吏士載孫吳兵法云有巾有蓋謂之武剛車爲先驅又爲屬車輕車爲後殿焉

牙旗繽紛

注

兵書曰牙旗者將軍之旌竿上以象牙飾之故

云牙旗 兩漢刊誤補遺曰袁紹傳拔其牙門注云卽司常職旌門是也孫權作大牙在中軍胡綜賦之曰周制日月實曰太常亦引用司常事然司常旌門本不言牙明堂位言商之崇牙者二注謂湯以武受命故常以牙爲飾簞簣則刻版重疊爲牙旗則刻繒爲牙然則牙旗之設商家遺制也後世牙門此其濫觴

腦方良

注

方良草澤之神也

周禮方相氏毆方良鄭注云

方良罔兩也國語曰木石之怪夔罔兩續漢志劉昭注云

罔兩山精好學人聲而迷惑人

溺女魃於神潢注神潢亦水名未知所在善曰山海經曰黃帝女魃所居不雨大荒北經云蚩尤作兵伐黃帝縱大風雨黃帝乃下天女曰魃雨止遂殺蚩尤魃不得復上所居不雨後置之赤水之北海內西經云赤水出崑崙東南隅非東京之地今據續漢志南陽郡蔡侯國注云有松子亭下有神陂南都所稱案張平子南都賦云松子神陂赤靈解角其上又云耕父揚光於清冷之淵此賦亦清冷神潢並言清冷水在南陽則神潢亦在南陽即神陂矣特立文彼此相避耳說文曰潢積水池也又云池陂也然則潢與陂義通二賦皆出平子可互證也

殘夔魑與罔象注說文曰罔象木石之怪續漢志注引東

京賦注云木石之怪夔罔兩水之怪龍罔像臣昭曰罔象

食人一名沐臙盧氏羣書拾補校改臙作腫莊子釋文曰罔象司馬本

作無傷云狀如小兒赤黑色赤爪大耳長臂一云水神名

說文虫部蛔蛔引國語曰木石之怪此作罔象誤

殪野仲而殲游光注惡鬼也廣雅曰火神謂之游光

況魃或與畢方注魃小兒鬼畢方老父神漢官舊儀曰顓

頊氏有三子生而亡去為疫鬼一居若水是為魍魎鬼

一居人室區隅漚庾善驚人小兒案獨斷無漚字庾作處

廣雅曰木神謂之畢方

却走馬以糞車注却退也老子曰天下無道戎馬生於郊天

下有道却走馬以糞河上公曰糞者糞田也兵甲不用却走馬以務農田然今言糞車者言馬不用而車不敗故曰糞車也 文子精誠篇曰夫召遠者使無為焉親近者言無事焉惟夜行者能有之故卻走馬以糞車軌不接于遠方之外是謂坐馳陸沈淮南覽冥訓述此文曰故卻走馬以糞而車軌不接於遠方之外以糞字斷句增一而字語意最為明晰此語本出老子而文子益以車軌二句賦用文子誤以車字屬上句也此注曲為之說殊失本意張景陽七命亦云卻馬於糞車之轅蓋用此賦而誤

南都賦

綠碧紫英注本草經曰紫石英生太山之谷 續漢志南陽

郡安眾侯國注引博物志曰有土魯山出紫石英據此亦南都所出

若夫天封大狐注天封未詳或曰山名也南郡圖經曰大胡山故縣縣南十里 水經泚水注云太胡山在泚陽北如東三十餘里張衡南都所謂天封大胡者也御覽地部引南陽圖經曰山有大石如狐明一統志云天封山在唐縣境一名大胡

皇祖歆而降福注毛詩曰獻之皇祖 續漢書祭祀志曰南頓君以上至節侯皆就園廟南頓君稱皇考廟鉅鹿都尉稱皇祖考廟鬱林太守稱皇曾祖考廟節侯稱皇高祖考廟賦云皇祖當統謂南頓以上何義門以為謂考侯非也

高曾祖廟皆在章陵不當偏舉其一言之

文選拾遺卷一終

男文煒校

文選拾遺卷二

番禺朱銘學

三都賦序

劉淵林注注三都賦成張載為注魏都劉逵為注吳蜀錢
 氏大昕養新餘錄云趙王倫傳有黃門侍郎劉逵未審即
 其人否銘按晉書左思傳云陳畱衛瓘為思賦略解序曰
 中書著作郎安平張載中書郎濟南劉逵並以經學洽博
 為之訓詁隋書經籍志云梁有張載及晉侍中劉逵晉懷
 令衛瓘注左思三都賦三卷綦母邃注三都賦三卷又南
 都賦穀猷孫挺下李注引張載吳都賦注後漢臧宮傳章
 懷引張載注蜀都賦則三都張並有注

揚雄賦甘泉而陳玉樹青葱無注宋張湜雲谷雜記云揚子雲甘泉賦云翠玉樹之青葱兮璧馬犀之璘璠顏師古曰玉樹者武帝所作集眾寶爲之用供神也使果爲種植之木則子雲決不與璧飾鐘虞等物並言矣諸說皆非是

蜀都賦

夫蜀都者蓋肇基於上世開國於中古注秦惠王討滅蜀王其後置蜀郡是時蜀人始通中國故言開國於中古也常璩華陽國志云帝嚳封其支庶於蜀世爲侯伯又云周失綱紀蜀先稱王後有王曰杜宇七國稱王杜宇稱帝禪位于開明帝始立宗廟據此則蜀之先世爲侯伯至是稱王與帝故云開國也若秦置蜀郡則國滅而爲郡縣不可

謂之開國矣

菌桂臨崖注神農本草經曰菌桂出交阯圓如竹爲眾藥通使一曰菌薰也葉曰蕙根曰薰按注後說見離騷然賦文印竹菌桂龍目荔枝四者相對不得分菌桂爲二且賦下有木蘭侵桂若以菌爲薰則桂混爲木桂下文不當重用矣

猩猩夜啼注猩猩生交趾封溪常璩南中志曰永昌郡古哀牢國有猩猩獸能言其血可以染朱罽則猩猩蜀地所出

其間則有虎珀丹青江珠瑕英注善曰博物志曰虎珀一名江珠常璩南中志云永昌郡博南縣有光珠穴出光珠

有虎珀續漢志亦言博南有光珠虎魄後漢西南夷傳曰
哀牢出金銀光珠章懷引博物志曰光珠即江珠也足明
琥珀非江珠據博物志琥珀雖有江珠之名然賦文二者
並言則不以爲一物矣

或藏蛟螭或隱碧玉注有鱗曰蛟螭蛟螭水神也一曰雌龍
也一曰龍子碧玉謂水玉也 按南都賦云憚夔龍兮怖
蛟螭四物並言此注蓋以下句碧玉爲一物故誤合蛟螭
矣郭璞山海經注曰蛟似蛇而四腳細頸有白嬰大者十
數圍卵生如一二斛甕能吞人廣雅曰有鱗曰蛟龍無角
曰螭龍續漢志越嶲郡注引廣志曰有縹碧石有綠碧則
碧玉亦當爲二物

聿兼鄧林注鄧林林名也 史記禮書阻以鄧林索隱曰按

裴氏引山海經以爲夸父棄杖爲鄧林其言北飲大澤蓋
非在中國也劉氏以爲今襄州南鳳林山是古鄧祁侯之
國在楚北境故云阻以鄧林也銘按荀子議兵篇云限之
以鄧林楊倞注鄧林北界鄧地之山林淮南兵略訓云垣
之以鄧林高注沔水上險楚蜀地相近則此賦亦非謂夸
父之鄧林

於東則左縣巴中無注廣雅曰縣連也以爲縣州在左者謬

下文云於西則右挾岷山左縣右挾對文不當以地言之
外負銅梁於宕渠注銅梁山名宕渠縣名 元豐九域志云
合州銅梁縣有銅梁山又云渠州流江縣有宕渠山則二

者並是因山名縣

菟醬流味於番禺之鄉注南越傳曰使唐蒙諷曉南越會蒙

以菟醬 明鄭露赤雅云菟醬猺崗中家家用之以葷菜

為主雜以香草葷菜吾家蛤蜊也銘按南方草木狀以菟

醬為葷菜吾粵謂之蕈以其葉合檳榔會之而不用為醬

故粵人亦罕知者海雪曾居搖中得之日驗此為確注舊

說皆誤

吳都賦

鮑龜鱗注鮑魚長三尺許無鱗身中正四方如印 御覽

引臨海異物志曰印魚形如鱗形額上方如印有文章

鷄鵬避風注鷄鵬鳥也似鳳 爾雅郭注云漢元帝時琅邪

有大鳥如馬駒時人謂之爰居晉李石續博物志曰條支

國臨西海出師子大雀郭義恭廣志曰大雀頸及身膺蹄

都似橐駝舉頭高八九尺張翅丈餘食大麥其卵如舊今

之駝鳥也

鵠鶴注鵠鶴出南海桂陽諸郡 集韻十五青云鵠鶴

鳥名畜之以厭火

刷盪漪瀾注漪瀾水波也善曰漪蓋語辭也 段氏玉裁云

毛詩淪漪與兮同漢石經魯詩殘碑作兮後人妄加水

作漪吳都賦乃有刷盪漪瀾濯明月於漣漪之句其謬甚

矣銘按御覽地部引爾雅曰風行水成文曰漣水波如錦

文曰漪然今本無此文

蓋象琴筑并奏注善曰說文曰筑似箏五絃之樂也 按段

氏注說文以五絃二字為譌御覽引樂書曰筑者形如頌

琴施十三弦頂細肩圓品聲按柱鼓法以左手扼之右手

以竹擊之

桂箭射筒注射筒竹細小通長長丈餘亦無節可以為射筒

戴凱之竹譜云射筒薄肌而最長節中貯箭李衍竹譜

詳錄云射筒竹七人有修竿通其節箭安其內從本吹之

古人所謂箛筒以射馬者也謂此竹可作箭房者非

結根比景之陰注善曰漢書音義如淳曰比景日中於頭上

景在己下故名之比景比方利切一作北云漢武時日南

郡置北按前後漢志並作比景縣言在日之南向北看日故名 兩

漢刊誤補遺曰攷古編云舊唐志景州北景縣晉將灌遂

破林邑五月五日即其地立表表在北而日影在表南郡

名日南則縣為北景仁傑按王充書謂日南郡有徙民還

者問之云日中之時所居之地未能在日南也蓋日南郡

縣惟五月日影在南故水經云比讀為蔭比之比言影為

身所庇此爾雅所謂岨齊以南戴日者也水經言是也

鷓鴣南翥而中畱注鷓鴣如雞或言此鳥常南飛不北 嶺

表錄異云鷓鴣吳楚之野悉有南越志云鷓鴣雖東西迴

翔然開翅之始必先南翥

開北戶以向日注日南人北戶猶日北人南戶也 梁書諸

夷傳曰海南林邑國本漢日南郡其國俗居處為閣名曰

于闐門戶皆北向淮南陸形訓反戶高誘注云在日之南皆爲北向戶故反其戶也則漢時人已有此說按水經溫水注引范泰善言曰日南張重舉計入洛帝問日南郡北向視日邪重曰日亦俱出東耳則太沖循用舊說而未審作離宮於建業注吳志曰孫權自會稽徙治丹陽建業人皆不樂徙故爲歌曰甯飲建業水不向武昌居按吳志吳主傳曰建業五年曹公表權爲討虜將軍領會稽太守十六年權徙治秣陵明年改秣陵爲建業二十五年權自公安都鄂改名武昌郡黃龍元年四月卽皇帝位九月權遷都建業據此則先從建業遷都武昌故人不樂徙而爲之歌注但云自會稽徙建業則不當有武昌居之言矣又宋

書五行志載孫皓初童謠曰甯飲建業水不食武昌魚甯還建業死不止武昌居按吳志皓亦曾從建業徙武昌蓋權皓同有是事而說者遂疑此注爲誤然寰宇記引武昌記云大帝築城于江夏遂欲都鄂改爲武昌其民謠曰云與宋書亦異還作歸止作向御覽鱗介部引吳志向又作就並以爲孫權時事此注歌詞中脫二句

虞魏之昆顧陸之裔注虞虞文秀魏魏周顧顧榮陸陸遜

文秀魏周吳志無傳按陳孔璋檄吳將校部曲云近魏叔英秀出高峙著名海內虞文繡砥礪清節耽學好古皆宏膺受多福保乂子孫又云聞魏周榮虞仲翔各紹堂構能負析薪則魏周榮虞仲翔乃文繡叔英之子注當云虞文

繡魏叔英又吳志無顧榮傳惟顧雍與子邵同傳亦當云

顧雍陸遜

戈船掩乎江湖注戈船船下有戈也 玉海引三輔黃圖曰

昆明池有百艘樓船上建樓櫓戈船各數十建戈矛然則

建戈矛故謂之戈船也

孟浪之遺言注孟浪猶莫絡也不委細之意善曰司馬彪莊

子注曰孟浪鄙野之語 王氏經義述聞曰凡書傳中言

無慮者自唐人已不曉其義高誘注淮南淑真篇曰無慮

大數名也廣雅曰無慮都凡也或但謂之慮荀子議兵篇

楊倞注曰慮大凡也無慮之轉又為摹略墨子小取篇摹

略萬物之然論求羣言之化摹略者總括之詞又轉之為

孟浪莊子齊物論李頤曰孟浪猶較略也吳都賦劉逵注

曰孟浪猶莫絡皆一聲之轉

魏都賦

昔市南宐僚弄丸而兩家之難解注莊子曰市南宐僚弄丸

而兩家之難解 莊子徐無鬼篇釋文曰司馬云宐僚楚

之勇士也善弄丸楚白公勝將作亂乃往告之不許也弄

丸如故白公遂殺子西子期宐僚不預其患又淮南主術

訓曰市南宐僚弄丸而兩家之難無所關其辭然則難解

者謂解使去已賦以謂二客之辨無關於已若以為排難

解紛則誤矣

爾其疆域注善曰地理志曰自高陵以東河東河內南有陳

及汝南之邵陵隱強新汲西華長平潁川舞陽鄆許鄆樊
陵河南之開封中牟陽武酸棗卷皆魏分也 善曰二字
衍下有李氏補注冀道二國名可證漢志東下有盡字陳
下有留字川下有之字隱作滙鄆作僞下無樊字按此地
理志敘列國疆域文也與卷首分列郡縣者異汝南郡無
新汲縣潁川郡有之河南郡無酸棗縣陳留郡有之續志
新汲酸棗亦屬潁川陳留此漢書前後舛錯也

蕙風如薰注善曰東京賦曰惠風橫被家語舜曰南風之薰
兮王肅曰薰風至之貌也 按尸子仁意篇祥風瑞風一
名景風一名惠風蕙當作惠薰字對下如醴亦承上珍樹
奇卉言之則薰當為香草謂樹卉之間風至如香草之薰

露降如甜酒之醴也

萬物可齊於一朝注莊子有齊物之論 錢氏養新錄云王
伯厚謂莊子齊物論非欲齊物也蓋謂物論之難齊也是
非毀譽一付於物而我無與焉則物論齊矣左思誤以齊
物兩字連讀

長塗牟首注牟者閣道有說者也霍光傳說昌邑王輦道牟
首鼓吹歌舞 上者說當作首室霍光傳注孟康曰牟首
地名如滄曰屏面也臣瓚曰池名在上林中師古曰瓚說
是也左思吳師古都賦劉逵以為閣道有室屋也此說更
無所出銘按牟首池在上林乃雍州地左思賦鄴都何得
遠涉長安前說皆非也霍光傳云召泰壹宗廟樂人輦道

文選補遺卷二
卒首鼓吹歌舞謂樂人首服耳後漢書禰衡傳云更著岑
牟單絞之服章懷注云岑牟鼓角士冑也集韻十九侯云
鞞鞞首鎧通作牟鞞然則牟首者言樂人皆著岑牟於首
盈輦道而鼓吹也賦云長塗牟首豪徽互經附以蘭綺宿
以禁兵言巡徼之兵首皆著冑也

蕭斧戡柯以柙刃注桓譚新論雍門周說孟嘗君曰以強秦
之勢伐弱燕譬猶斲蕭斧以伐朝菌也說文蕭字注云

蒿也徐氏繫傳云古人言蕭斧謂芟艾之斧也

韎昧任禁之曲注善曰韎昧皆東夷之樂而重用之疑悞也

虞世南北堂書鈔樂部引左思魏都賦云鞞鞞所掌之
音韎任株離禁之曲虞在李氏之前所引當不誤

邁梁騶之所著注魯詩傳曰古有梁騶梁騶天子獵之田曲

也按班固東都賦李注引此傳無獵曲二字漢書地理
志云濟南郡有梁鄒縣則是地名此語在魯詩蓋卽騶虞
之傳非詩以梁騶名篇也說者或反以有獵曲二字爲是
謂梁鄒爲田獵之曲斯大謬矣

籀校篆籀注漢書音義曰周宣王太史大篆也按漢書藝

文志太史試學童有篆書顏師古曰篆書謂小篆蓋始皇
使程邈所作也又小學家有史籀十五篇注云周宣王太
史作大篆十五篇

是故料其建國析其法度注善曰說文曰析量也按說文

曰料量也又曰析破木也此注析當作料讀者多誤以釋

下句段氏於說文析字引此注亦誤

真定之梨故安之栗注真定屬中山郡故安屬范陽又云故

安今見屬中山郡 晉志常山郡有真定縣范陽國有故

安縣中山國無之注誤

雖選言以簡章徒九復而遺旨注逸詩九變復貫知言之選

漢書武帝紀元朔元年詔曰詩曰九變復貫知言之選

臣瓚曰九數之多師古曰貫事也選擇也循環復舊擇善

而從之銘按此詩謂凡言屢變還復舊貫則知其言選擇

于盡善耳賦特反其意用之

摧惟庸蜀與鵠鵠同窠注左氏傳曰鸚鵡株株 考工記疏

云按異義公羊以為夷狄之鳥穴居今來至中國巢居穀

梁亦以為夷狄之鳥來中國賦以鵠鵠比庸蜀從公穀義也李注引左氏失之

深頌靡測注老子曰夫惟不可識故強為之頌 今本老子

顯德篇頌作容按頌與容通鄭氏詩譜曰頌之言容天子

之德無不覆燾無不持載

甘泉賦

孝成帝時客有薦雄文似相如者注善曰雄答劉歆書曰雄

作成都城四隅銘蜀人有楊莊者為郎誦之於成帝以為

似相如雄遂以此得見 野客叢書云法言雄答劉歆書

曰蜀人有楊莊者為郎誦之於成帝成帝好之以為似相

如乃知以為似相如者帝驚驚之語非客薦之詞

正月從上甘泉還奏甘泉賦以風注善曰漢書曰永始四年

正月行幸甘泉七略曰甘泉賦永始三年正月待詔臣雄

上疑七略誤也成帝紀曰永始三年十月皇太后詔有

司復甘泉泰時然則甘泉久不祀至三年十月乃修復則

七略言正月者誤也又曰四年正月行幸甘泉郊泰時蓋

十月修復故帝得正月行幸作賦當在此時或以爲元延

二年幸甘泉所作非也說詳羽獵賦

八神奔而警蹕兮注服虔曰自招搖遊神之屬也張晏曰堪

輿至猶狂八神也善曰漢書武帝紀曰用事八神文穎曰

八方之神也按服張二說皆不足八神之數猶狂輩皆

惡鬼亦不得謂之神漢書郊祀志曰始皇祠名山川及八

神八神將自古而有之或曰太公以來作之一曰天二曰

地三曰兵四曰陰五曰陽六曰日月七曰日八曰四時又云

上遂東巡海上行禮祠八神然則八神之名秦以上已有

之武帝之詔子雲之賦皆本於此

臯伊之徒冠倫魁能注應劭曰冠其羣倫魁傑也漢書以

魁字絕句師古曰言選擇賢臣可匹耦於古賢臯繇伊尹

之類冠等倫而魁傑與應劭注皆止於魁字而以能字屬

下句錢氏大昕曰斗魁戴筐六星曰文昌魁下六星兩兩

相對曰三台能古台字魁能即魁台也

子虛賦

蓮藕觚盧注張晏曰觚盧扈魯也漢書注郭璞曰菰蔣也

蘆葦也師古曰郭說非也但不知觚盧於今是何草耳銘按觚盧扈魯卽壺盧皆馨之轉也古今注謂壺盧爲匏之無柄者然此承上埤溼而言故蒹葭雕胡蓮藕並爲水澤所生若壺盧非所宜生矣史記作菰蘆通雅云言菰茭蘆筍皆可食者也此說得之

騰遠射干

注

張揖曰射干似狐能緣木服虔曰騰遠獸名也

焦氏筆乘云莊子騰猿得枳棘南都賦鸞鸞鷓鴣雛翔其上騰猿飛獼棲其下猿遠字相近而誤說似近之釋元應一切經音義云野干形色青黃如狗羣行夜鳴聲如狼引此賦云射音夜野夜同聲然則射干卽野干也周禮地官射人云土以三耦射豻侯鄭注云大射禮豻作干胡犬也

疏云謂胡地之野犬皆同物也

蠖蜒龜犴

注

郭璞曰蠖蜒大獸似狸長百尋龜似狸而大犴

胡地野犬也似狐而小

爾雅曰龜犴似狸郭注今山民

呼龜之大者爲龜犴是龜犴二字爲一名犴與犴同賦云白虎元豹蠖蜒龜犴當爲四物宜從爾雅注羅願云孫愐說犴犴長八尺正當一尋郭氏蓋見西京賦云巨獸百尋故云爾漢武帝作蛇龍曼延之戲郭氏祇據此爲說不原物之本狀耳

射乎之罍

注

晉灼曰之罍山在東萊睡縣獵其上也

注與

漢志同史記注云在牟平縣誤寰宇記引史記云始皇三十七年自琅琊使徐福採藥福言嘗苦大魚爲患於是登

之罘山射巨魚子虛賦云射乎之罘是也其山在海中然則賦用始皇事也

上林賦

出乎椒丘之闕注服虔曰丘名善曰楚辭曰馳椒丘兮焉且且止也音昌呂切離騷曰步余馬於蘭皋兮馳椒邱且焉止息王逸注曰土高曰邱四墮曰椒邱銘按此蘭椒並言相如賦亦對下桂林自是草木名索隱引如淳云邱多椒也吳斗南亦云山海經琴鼓之山多椒柘是也此注衍誤

雜以畱夷注張揖曰畱夷新夷也師古曰畱夷香草也非新夷新夷迺樹耳銘按北山經曰繡山其草多芍藥郭注

云芍藥一名辛夷亦香草屬廣雅曰攣夷芍藥攣畱聲相近芍藥卽畱夷顏蓋以木筆花樹高大餘者亦名辛夷故以辛夷爲樹耳

葳持若蓀注韋昭曰持音懲張揖曰葳持闕郭璞曰蓀香草也史記持作橙郭璞曰橙柚索隱云姚氏以爲此前後皆草非橙也今讀者亦呼爲登謂金登草也漢書師古注曰葳寒漿也持當爲苻字之誤耳苻鬼目也銘按顏改爲苻亦無可據子虛賦云葳析苞荔此持字卽析之訛二賦漢書本合爲一篇而江離蘼蕪衡蘭蕙若諸草皆復用之足證此字爲析之誤也

鮮支黃礫注司馬彪曰鮮支支子也漢書師古注曰鮮支

卽今支子樹也黃礫今用染者黃屑之木也二者雖非草類或者賦雜言之耳銘按古今注云燕支葉似薊花似蒲公出西方土人以染名爲燕支中國人謂之紅藍以染粉爲面色本草有黃藥李時珍云其莖高二三尺柔而有節似藤葉大如拳其根外褐內黃人皆壽其根入染藍甌中云易變色也賦蓋謂此

其獸則麒麟角端

注

郭璞曰角端似豹角在鼻上中作弓

豹史記集解引郭注作似豬堪作弓李陵嘗以此弓十張遺蘇武也說文觶字云角觶狀似豕爾雅翼曰或云似牛續漢書鮮卑有角端牛以角爲弓宋符瑞志曰角端日行一萬八千里又曉四夷之語明聖在位則奉書而至此乃

異物非角爲弓者也賦與麒麟並言恐當謂此

畱落胥邪

注

郭璞曰畱未詳落樸也中作器胥邪似并閭皮

可作索

爾雅曰劉劉杙郭注云劉子生山中實如梨酢

恬核堅出交趾吳都賦云採樛禦霜劉達注與郭同然則畱樛劉並通也爾雅樛落郭注云可以爲杯器素按說文樛與樛同解云木也以其皮裹松脂讀若訇繫傳云此卽今人書樛字裏松脂所以爲燭也據此落卽是樛賦上已有樛此不當重用蓋畱落二字爲一名卽劉杙之轉聲耳畱落雙聲今合呼則成劉字故又可名劉也

文選拾遺卷三

番禺朱銘學

上林賦

扈從橫行出乎四校之中注晉灼曰扈大也張揖曰跋扈縱橫不案鹵簿也文穎曰凡五校今言四者中一校從天子乘輿也師古曰四校者闡之四面言其跋扈縱恣而行出於校之四外也葉夢得石林燕語云從駕謂之扈從始司馬相如賦張揖謂跋扈縱橫侍天子而言跋扈可乎唐封演以爲扈養以從猶之僕御此或近之銘按宋玉九辨云載雲旗之委蛇兮扈屯騎之容容王逸注云羣馬分布列前後也則訓扈爲分布扈從者謂百官分布行列以從

也橫行者謂五校兵各有部伍至是出其部伍橫行將遮禽獸以待獵也下始云鼓嚴簿縱獵者此安得不鼓而縱恣師古說亦誤

足壘羊注張揖曰壘羊麕羊也似羊而青 史記集解引郭

璞曰野羊如羊千斤師古曰今之所謂山羊也非麕羊矣

銘按字林云獬野羊大角者也其角堪為鞞月小楹也出

西方似吳羊而大角角重於肉呼為獬羝

蒙鵠蘇注孟康曰蘇析羽也善曰蒙謂蒙覆而取之 史記

集解引徐廣曰蘇尾也漢書注郭璞曰蒙其尾為帽也按

續漢志有鵠冠蒙謂冒之於首此言獵獲鵠鳥以尾為冠

李注誤

縉白虎被班文注郭璞曰縉謂絆絡之也善曰班文虎豹之

皮也司馬彪漢書曰虎賁騎皆虎文單衣 司馬彪續漢

志曰虎賁將縉白虎文李注當並引此此賦謂獵取虎皮

為衣縉

格蝦蛤注孟康曰蝦蛤獸名蛤音閣 蝦蛤史漢注並未詳

博物志曰蜀山南高山上有物如獼猴長七尺能人行健

走名曰猥搜神記曰名猥一名馬化猥蛤聲相近疑即

蝦蛤也此賦有三猥雌猥說文訓為母猴猥猥猥皆非

同物

鋌猛氏注郭璞曰今蜀中有獸狀如熊而小毛淺有光澤名

猛氏 按郭說見西山經名曰猛豹郭彼注與此同而下

有食蛇食銅鐵出蜀中八字此即說文似熊而黃之貌猛
獮一聲之轉也賦上文已有獮張揖注云白豹則以此為
似熊之獮亦可通

射游臯

注

張揖曰臯惡鳥也郭璞曰臯羊也善曰高誘淮南

子注臯羊山精也

爾雅曰狒狒如人被髮迅走郭注云

臯羊也山海經曰其狀如人面長脣黑身有毛反踵見人

則笑交廣及南康郡山中亦有此物大者長丈許俗呼之

曰山都

淮南干遮

注

干遮曲名

方以智通雅云哀六年公羊傳于

諸其家何休注于諸寘也齊人語也相如賦于遮亦于諸

之音也智謂諸者古人語詞猶今之言這言著也按此干

當作于

易服色

注

郭璞曰衣尚黑

武紀曰太初元年夏五月正厯

色尚黃張晏曰漢據土德然則時雖用夏正而服色不尚

黑

羽獵賦

故聊因校獵賦以風之

注

善曰七略曰羽獵永始三年十二

月上按七略以幸甘泉為永始三年事故謂羽獵同此

年非也成帝紀曰永始四年正月行幸甘泉三月行幸河

東祠后土揚雄傳云其三月祭后土還上河東賦其十二

月羽獵是當在四年也餘見甘泉賦

然後先置乎白楊之南

注

服虔曰白楊觀名也

黃圖云白

楊觀在昆明池東

青雲為紛紅蜺為纓注韋昭曰紛旗旒也纓旗上繫也爾雅釋器曰律謂之分郝氏疏云律率古字通說文捕鳥畢也分與紛其音同即羽獵賦之青雲為紛說文曰纓落也段氏云馬融傳曰纓橐四野之飛征注引賈逵云纓還也還環古今字然則謂以青雲為網紅蜺為絡所以遮羅環繞禽獸者也賦下云淫淫與與前後要遮亦承此二句言之

徽車輕武注晉灼曰徽疾貌也善曰廣雅曰武健也漢書

師古注曰徽車有徽幟之車也續漢志曰輕車古之戰車也不巾不蓋建矛戟幢麾又曰孫吳兵法云有巾有蓋謂

之武剛車徽即麾矣輕武當為輕車武剛車

蹶浮麋注善曰浮麋過麋也漢書師古注曰浮麋水上浮

者也銘按浮麋遊麋也師古說非是

長楊賦

明年上將大誇胡人以多禽獸注善曰七略曰羽獵賦永始三年十二月上然永始三年去校獵之前首尾四載謂之明年疑班固誤也又七略曰長楊賦綏和元年上綏和在

校獵後四歲又疑七略誤按羽獵在永始四年說已見前七略誤也漢書成紀曰元延二年冬行幸長楊宮從胡客大校獵是年與永始四年實相去二載此云明年亦誤也又成紀言冬校獵而楊雄傳言秋說者遂謂是年校獵

有二然傳云秋命右扶風捕諸郡禽獸輸長楊此賦云先命右扶風李注謂冬將校獵故秋先命之其實非有二次校獵也或又謂羽獵在元延二年冬長楊在三年秋尤誤羽獵賦無胡客事唯此賦云錫戎獲胡乃及胡客紛紛之說皆無所據七略以為綏和元年亦非也

羌戎睚眦注晉灼曰睚眦目貌也武紀曰元鼎五年西羌眾十萬反六年征西羌平之

陵夷而不禦也注善曰韓詩曰無矢我陵薛君章句曰四平曰陵按曹大家東征賦李注引王肅家語注曰陵遲猶陂陀也陵遲猶陵夷矣又郭璞注上林賦曰陂陀旁頽也匡謬正俗云陵為陵阜之陵古者遲夷通用夷平也言陵

阜漸平喻王道弛替耳

北征賦

過泥陽而太息兮悲祖廟之不脩注漢書北地郡有泥陽縣漢書曰班壹始皇之末避地於樓煩故泥陽有班氏之廟也按漢書地理志泥陽屬北地郡樓煩屬雁門郡蓋班氏之先曾居北地故泥陽有祖廟耳

西征賦

反初服於私門注戰國策蘇子說魏王曰破公家而成私門潘岳傳曰楊駿誅除名未幾選為長安令反私門謂除名也

雖勉勵於延吳注禮記曰延陵季子適齊其長子死列子曰

魏有東門吳者子死而不憂 按禮記季子曰骨肉歸復于土命也賦謂欲如季子之安命延吳謂延陵吳季子耳此注分爲二人季子獨稱延字恐非賦意

升曲沃而惆悵注 曲沃在河東聞喜縣然此曲沃在西因彼曲沃而得名今因名而說彼 括地志曰曲沃有城在陝縣西南三十二里漢書高帝紀十一年師古注曰潘岳以陝之曲沃爲成師之所居然則此曲沃但與桓叔所封同名賦以言晉事故師古譏之

縣弘農而遠關注 漢書元鼎三年徙函谷關於新安 漢書武紀注應劭曰時樓船將軍楊僕數有大功恥爲關外民上書乞徙東關以家財給其用度武帝意好廣關於是徙

關於新安去宏農三百里此所謂遠關也以爲潼關者誤曾不得與夫十餘公之徒隸齒注 十餘公之徒謂蕭曹之屬也張湛列子注曰隸猶羣輩也一云徒隸賤人也 匡謬正俗云身沒之後考其名行乃不得與蕭曹終賈之卒徒奴隸齒潘生所以深鄙其人示貶抑之甚也後之讀者不解其意但言不得與十餘公之屬爲齒乃謂隸齒爲齊等之義

野蒲變而成脯苑鹿化以爲馬注 風俗通曰秦相趙高指鹿爲馬東蒲爲脯 野客叢書云今史記但聞指鹿爲馬不聞以蒲爲脯之說此見漢人雜說臧榮緒晉書嘗引以爲言歐陽詢蒲柳門載趙高此事謂出於史記誤矣銘按歐

陽詢藝文類聚艸部云史記趙高將爲亂先設驗獻蒲以爲脯惑二世此言未必無據明陳耀天中記載此事謂見風俗通古今注然今本亦無此文

感市閭之菽井注說文曰菽麻蒸也阻畱切然菽井卽涓城賣蒸之市也程氏瑤田九穀考云東方朔七諫曰菽落雜於廢蒸王逸注泉翮曰廢廢一作菽洪興祖補注蒸折麻中幹也潘岳西征賦菽井今市木者交午積之如井字形所謂菽井周禮司烜氏共墳燭庭燎故書墳爲蕢鄭司農云蕢燭麻燭也今世猶以麻蒸爲夜行燎也

登樓賦

北彌陶牧注盛弘之荊州記曰江陵縣西有陶朱公冢水

經夏水注云王隱晉書地道記曰陶朱冢在華容縣樹碑云是越之范蠡晉太原當作康地記盛弘之荊州記劉澂之記並言在縣之西南郭仲產言在縣東檢其碑題云故西戎合范君之墓碑稱蠡是其先也故違眾論從而正之

遊天台山賦

赤城霞起而建標注孔靈符會稽記曰赤城山名色皆赤狀似雲霞實宇記天台縣云赤城山在縣北六里又述異記云赤城山一峯特高可三百丈丹壁爍日此賦所云建標也

玉堂陰映于高隅注十洲記曰承淵山瓊華之室實宇記云道書所謂玉堂天台山其山八重許邁與王逸少書曰

自山陰至臨海多有金庭玉堂仙人芝草也

魯靈光殿賦

朱闕巖巖而雙立 善曰李尤德陽殿賦朱闕巖巖 水經

泗水注云孔廟東南五百步有雙石闕即靈光南闕北百

餘步即靈光殿基

於是乎乃歷夫太階以造其堂無注 晉天文志曰三台為天

階太一躡以上下一曰泰階

鴻荒朴略厥狀睢盱注 睢盱質朴之形善曰字林曰睢仰目

也盱張目也 淮南俶真訓云乃至神農黃帝剖判大宗

竅領天地萬民睢盱盱然莫不竦身而載聽視高注云

睢盱聽視貌

景福殿賦

承以陽馬接以員方注 陽馬四阿長桁也馬融梁將軍西第

賦曰騰極受檐陽馬承阿 九章算術魏劉徽注云今謂

四柱屋隅為陽馬假令立方一尺邪解立方得兩漣堵邪

解漣堵其一為陽馬一為鼈臙陽馬居二鼈臙居一合兩

鼈臙成一陽馬臙者臂骨也據此則陽馬乃邪角之形也

於是蘭栴積重窠數矩設注 以木蘭為栴言蘭栴重疊交互

以相承有似窠數蘇林漢書注曰窠數四股鉤 按張載

注靈光殿賦云芝栴山節方小木為之與窠數之形為近

漢書東方朔傳曰著樹為寄生盆下為窠數師古曰窠數

戴器也以盆盛物戴於頭上則以窠數薦之今賣白團餅

人所用也寄生芝菌之類著樹而生形有周圓象窠藪者
雙枚既脩重桴乃飾注雙枚屋內重檐也重桴重棟也在內
謂之雙枚在外謂之重桴言重檐既長因達于外而為重
棟以施采飾也 阮氏棟梁考曰屋材之大者曰棟曰梁
棟者五架屋由東至西最高中脊下橫木之名也梁者屋
中四柱前二柱曰楹由北至南縱架柱上之木名也是以
棟宜三而梁宜二梁者受短柱以載棟楣下架於南北兩
楹之上而更出於南楹之南北楹之北以載南北兩檐雷
銘按五架屋用大梁二即賦所謂雙枚者也說文曰桴楣
棟也重屋故重桴矣梁既出于兩檐之外以承檐雷故賦
下二句云楹枳緣邊楹枳即屋檐也李注檐棟不分內外

淆惑殆全誤矣

鎮以崇臺寔曰永始復閣重闈猖狂是俟注永始臺名莊子

曰猖狂妄行也 寰宇記引魏略曰黃初五年文帝東征

畱郭后于永始臺零雨百餘日城樓多壞有司請移址后

曰昔楚昭王出遊真御覽引姜畱漸臺江水至使者迎而

無符不去卒沒今帝在遠未有急而便移址未可也何晏

景福殿賦云復道重閣猖狂是俟

點以銀黃注黃謂黃金 西山經曰皋塗之山其陰多銀黃

按銀黃即黃銀也御覽引禮斗威儀曰君乘金而王則黃

銀見宋方勺泊宅編云黃銀出蜀中其色與上金無異上

石則正白昔唐太宗嘗以黃銀帶賜房元齡隋文帝時并

州出黃銀刺史辛公義嘗以獻上又吳曾漫錄云青霞子曰丹砂伏火化為黃銀唐日華寶藏論云銀有雄黃銀雌黃銀然則黃銀亦有山出火化二種

海賦

纖蘿不動注爾雅曰唐蒙女蘿爾雅曰薄海藻郭注云藥

艸也一名海蘿如亂髮生海中李注誤

陽冰不治陰火潛然注言其陽則有不治之冰其陰則有潛

然之火也陳氏倫炯海國聞見錄云自俄羅斯而東皆

為北海不能行舟海冰不解故為冰海陸氏次雲繹史紀

餘曰冰海海水皆有火性撥之光起故不成冰獨北海之

北陽和少及其候極寒冬日凝冰恆如山立入夏始無其

迹宋龐元英文昌雜錄云鴻臚陳大卿言昔使高麗行大

海中水深碧色夜見海中如火龍無數甚可怖也周密齊

東野語云海水以杖擊之火星勃然許氏纘曾東還紀程

云滇洱海東岸有分水崖南為河北為海鹹淡不類冬月

海風水面起火高數丈莫知其故按諸說則凡海水皆然

蓋鹹鹵結而成耳

江賦

王珧海月注郭璞山海經注曰珧亦蚌屬也臨海水土物志

曰海月大如鏡白色正圓常死海邊其柱如搔頭大中食

王當作玉爾雅曰蜃小者珧郭注云珧玉珧即小蚌銘

按此即江珧柱也宋江鄰幾雜志說江珧極詳言肉腥而

腮不中口僅四肉牙最佳耳又云江珧卽海月則誤矣諸說江珧者皆未審吾粵近海有江珧得目驗之其形上下小長三四寸廣不過二寸兩片相合似牛角狀而短殼外有稜如瓦屋子甚薄有紫文其肉彩色光瑩其柱色白如雪味殊美一名馬甲柱與海月絕不相類閩中海錯疏云海月形圓如月亦謂之蠣鏡土人多磨礪其殼使之通明鱗次以蓋天窗本草云嶺南謂之海鏡又曰明瓦土肉石華注臨海水土物志曰石華附石生肉中啖閩中海錯疏云石華附石而生方言謂之石霍肉如蠣房殼如牡蠣而大

瓊瑤腹蟹

注南越志曰瓊瑤長寸餘大者長二三寸腹中有

蟹子如榆莢合體共生俱爲蚌取食漢書地理志師古注曰鮎蚌長一寸廣二分有一小蟹在腹中任昉述異記云瓊瑤有一小蟹在腹中故江淮之人呼爲蟹奴又云南海有水蟲名曰鮎蚌蛤之類也其小蟹大如榆莢筋開甲會則蟹亦出爲筋取食嶺表錄異云海鏡兩片相合以成形殼圓腹中有小蟹子其小如黃豆而螯足皆具備按粵東有此物銘亦嘗目驗之殼圓廣約三寸剖其腹有物如猪胃小蟹正在其旁唯六足無螯土人呼爲日月蠔肉白如雪味與江珧畧相似也然則三物皆同類師古謂瑤長一寸蓋圓而大者爲海鏡狹而小者爲瓊瑤

石蚌應節而揚葩

注南越志曰石蚌形如龜腳得春雨則生

花花似草華廣雅曰葩花也 閩中海錯疏云石蚶如蠟房之附石也形如龜腳故名近甲處有軟爪黑色肉白味佳秋生冬盛來年正月得春雨軟爪開花如絲散在甲外又周櫟園閩小紀云閩中龜腳味劣而值亦賤江淹賦以為石蛙一名紫蠶春而發華謝靈運詩云紫蠶燁春流燁者言華也荀子書名紫蛙今海中龜腳附石而生並無發華者

檉杞種薄於溱澨注檉杞二木名 李時珍本草綱目云檉

木一名檉木陳藏器曰檉木生江南深山大樹樹有數種取葉厚大白花者入藥灰入染家用

協榿森嶺而羅峯注協榿亦二木名也 廣韻十二霽云協

小榿木名集韻云協果名似枇杷

風賦

離秦衡注秦香草也衡杜衡也又云秦木名也范子計然曰秦衡出於隴西天水 御覽引范子計然曰楚蘅出楚國也此與李注所引蓋同一事杜衡一草生秦地者名秦衡生楚地者名楚衡隴西天水皆秦地也且賦上句蕙草一物此不得為二草明矣

秋興賦

優哉游哉聊以卒歲注家語孔子歌曰優哉游哉聊以卒歲按左氏襄二十一年傳叔向引詩與此同杜注云詩小雅然小雅采菽篇曰優哉游哉亦是戾矣唯有上句史記

世家孔子生於襄公二十二年則此詩在孔子之前

月賦

于時斜漢左界注大戴禮曰七月漢案戶漢天漢也案戶直戶也 洪氏震煊大戴禮記疏義云說文云直正見也夏后氏世室每室四戶漢見於南戶北戶七月漢在箕斗是正南也八月則斜倚矣左傳昭十七年疏云八月之昏天漢東北斜列于天是也按此則賦言八月時左界正在東北也

徘徊房露

注

房露蓋古曲也文賦曰寤防露與桑間房與防

古字通

宋書謝靈運傳山居賦云楚客放而防露作自

注云東方朔感江潭而作七諫攷楚詞東方朔七諫初放

篇云便娟之脩竹兮寄生乎江潭上葳蕤而防露兮下泠泠而來風王逸注云防蔽也言竹上則葳蕤而防蔽霧露下則泠泠清涼可休庇也言已德上能覆蓋於君下能庇蔭於民然則防露非曲名但取朔追閔屈原之詞為言耳

鵬鳥賦

禍兮福所倚福兮禍所伏

注

鵬冠子曰禍乎福之所倚福乎

禍之所伏

索隱云此老子之言以言禍福遞來猶如倚

伏也銘按此見老子順化篇

品庶每生

注

孟康曰每貪也

史記每生作憑生索隱云服

虔曰每念生也鄒誕本亦作每言唯念生而已今此作馮

馮亦持念之意也按方言每字合從手旁銘按說文中部

毒字云草盛上出也段氏云毒是草盛引伸爲凡盛如品
庶毒生貪也皆盛意然則毒爲草盛上出卽有貪生之意
左氏昭五年傳曰今君奮焉震電憑怒杜注云馮盛也故
每憑二字義得相通

鷓鴣賦

鷓鴣賦注詩義疏曰桃蟲今鷓鴣微小黃雀也又方言曰桑
飛郭璞注曰卽鷓鴣也自關而東謂之工雀又云女工一
云巧婦又云女匠 方言云桑飛自關而東謂之工爵或
謂之女鷓自關而西謂之鷓鴣不言卽鷓鴣荀子勸學篇
楊倞注云蒙鳩鷓鴣也引說苑客謂孟嘗君曰鷓鴣巢於
葦茗著之以髮可謂完矣郭蓋本劉向此說附合工爵女

匠之名遂以桑飛爲鷓鴣又於方言注辨鷓鴣非鷓鴣故
其注爾雅桃蟲鷓云俗呼爲巧婦又注鷓鴣鷓鴣云鷓類
此皆展轉而誤也按爾雅文二鳥次第相去懸絕則鷓非
鷓鴣明矣詩鷓鴣毛傳俱用爾雅說文曰鷓鴣鷓鴣也鷓
鷓桃蟲也陸機詩疏云桃蟲今鷓鴣是也微小於黃雀又
云鷓鴣似黃雀而小取茅莠爲巢以麻紵之如刺襪然幽
州人謂之鷓鴣或曰巧婦亦皆分爲二鳥

鷓鴣介其背距注山海經曰燿諸之山多鷓郭璞曰似雉而
大青色有角鬪死乃止出上黨 說文鷓字云似雉出上
黨徐氏繫傳按顏之推家訓曰鷓上黨數嘗見之黃黑無
駁雜色又鷓字云鳥似鷓而青出羌中徐云苟差反按郭

注青色則誤以鴝為鶻陸佃埤雅云鶻黃黑色故其名曰鶻有毛角此注脫毛字

戀鍾岱之林野注鍾岱二山漢書曰趙地鍾岱迫近胡寇如涪曰鍾所在未聞東方朔十洲記曰北海外有鍾山 水經河水注云鍾山即陰山東西千餘里單于之苑囿也續漢志五原郡西安縣北有陰山

赭白馬賦

秀騏齊注尸子曰馬有秀騏逢醜毛萇詩傳曰騏綦文也爾雅曰驪如馬一角不角者騏郭注云元康八年九真郡獵得一獸大如馬一角角如鹿茸此即驪也今深山中入時或見之亦有無角者按賦當謂此非凡馬也說文曰

于步止也丑玉切

舞鶴賦

舞鶴賦無注

無注

通典云鶴舞馬舞竹書穆天子傳亦有之宋鮑

昭又有舞鶴賦此舞或時而有非樂府所統

偉胎化之仙禽注

注

相鶴經曰龜背鼈腹則能產

冷齋夜話

云淵材嘗畜兩鶴客至指以誇曰此仙禽也凡禽卵生而此胎生語未卒園丁報曰此鶴夜產一卵大如梨讀相鶴經未熟耳銘按相鶴經言千六百年乃胎產則謂凡鶴皆不卵生者誤矣

文選拾遺卷三終

男文煒校

文選拾遺卷四

番禺朱銘學

思立賦

志搏搏以應懸兮注搏搏垂貌善曰戰國策楚王曰寡人心

搖搖然如懸旌案此承上繩墨言考工記輪人為輪縣

之以眡其輻之直也注云從旁以繩縣之中繩則鑿正輻

直矣應縣謂其心正直合於繩墨之縣

辦貞亮以為輦兮雜伎藝以為珩注輦所以帶珮也善曰說

文曰輦覆衣大巾也從巾般聲禮記曰男輦革鄭立曰輦

巾囊盛帨巾者說文曰珩所行也案此不當引說文巾

部之輦革部別有輦字注云大帶也引易曰或錫之輦帶

周禮巾車疏引易注云鞶帶佩鞶之帶賦謂辨帶而佩以珩玉耳鄭注別是一義皆非賦意也巾囊當作小囊說文珩佩上玉也所以節行止也此注亦誤

鑽東龜以觀禎

注

周禮曰東龜長又曰東龜曰甲屬善曰爾

雅曰龜左睨不煩郭璞曰行顯左睨也周禮龜人云東

龜曰果屬鄭注云東龜青杜子春讀果爲羸疏釋曰爾雅

云前夤果甲向前而夤也又爾雅左睨不類郭注云行頭

左庫此據周禮鄭注乃是西龜李注誤引

偉關雎之戒女

注

詩曰關關雎鳩案毛詩傳箋皆無戒女

意容齋四筆云關雎大序云后妃之德而魯詩云后夫人

雞鳴佩玉去君所周康王后不然故詩人歎而傷之後漢

皇后紀康王晏朝關雎作諷蓋用此也顯宗永平八年詔

云昔應門失守關雎刺世注引春秋說題辭曰人主不正

應門失守故歌關雎以感之宋均云應門聽政之處也言

不以政事爲務則有宣淫之心關雎樂而不淫思得賢人

與之共化修應門之政者也薛氏韓詩章句曰詩人言鴟

鳩正潔敬正以聲相求隱蔽于無人之處故人君退朝入

于私宮后妃御見有度應門擊柝鼓人上堂退及燕處體

安志明今時大人內傾于色賢人見其萌故詠關雎之說

淑女正容儀以刺時三說不同如此然則賦用三家說也

樹德懋于英六

注

英六國也楚末乃滅夏本紀索隱云地

理志六安國六縣咎繇後偃姓封國英地闕不知所在以

爲黥布是其後也江氏永春秋地理考實云僖十七年經齊人徐人伐英氏杜注楚與國彙纂今廬州府六安州西有英氏城接英山縣境

揚雜錯之袿注爾雅曰婦人之微謂之縞郭璞曰卽今香

纓也爾雅郝疏云禕者說文以爲蔽邾方言以爲禕卽

禕也釋名云鞞所以蔽邾前也婦人蔽膝亦如之郭以爲

香纓誤矣說文幃囊也郭蓋誤以幃爲禕微禕之假借耳

按後漢注引郭說亦同此誤

集太微之閭注春秋合誠圖曰太微其星十二楚詞遠

遊篇曰問太微之所居王逸注云博訪天庭在何處也淮

南天文訓曰太微者太乙之庭也

觀壁壘於北落兮注壁營壁也壘中壘也北落星名也善曰

漢書曰羽林天軍西爲壘或曰鉞傍一大星曰北落星

經云羽林天軍星四十五星壘壁十二星並在室南主翊衛

天子之軍又云北落師門一星在羽林天軍西主候兵賦與

北落並言當謂此別有天壘星與此異

閑居賦

谿子巨黍注許慎曰南方谿子蠻夷柘弩皆善材也孫卿子

曰繁弱巨黍古之良弓淮南淑真訓曰烏號之弓谿子

之弩高注云谿子爲弩所出國名也或曰谿蠻夷也以柘

桑爲弩因曰谿子之弩也一曰谿子陽鄭國善爲弩匠因

以名也荀子性惡篇楊倞注云鉅與拒同黍當爲來史記

蘇秦說韓王曰時力距來司馬貞云言弓弩執勁足以拒於來敵也王氏念孫曰來乃黍之譌足以距來敵緣文生訓失之距黍疊韻字

張公大谷之梨注大谷未詳 寰宇記洛陽縣云大谷在縣

東五里張衡東京賦曰盟津達其後大谷通其前陳思王洛神賦云經通谷潘岳閑居賦云張公大谷之梨皆謂此太夫人乃御版輿注版輿一名步輿周遷輿服雜事記曰步輿方四尺素木爲之以皮爲襜褕之 野客叢書云世率以板輿爲奉親事用不知當時三公告老亦許以板輿上殿如傳祇者梁韋睿以板輿自載督厲衆軍則知板輿不止一事銘案宋書禮志云晉泰始四年皇太后崩有司奏

前代故事闕輦板輿則又用爲喪車

歎逝賦

對瓊藥之無徵注西京賦曰屑瓊藥以朝飡 漢書司馬相如傳噉瓊華張揖注云瓊樹生崑崙西流沙濱大三百圍高萬仞華藥也食之長生

懷舊賦

前瞻太室傍眺嵩丘注戴延之西征記曰嵩高中嶽也東謂太室西謂少室摠名嵩也小說曰昔傅亮北征在河中流或人問之曰嵩丘太室一山何云前瞻傍眺哉亮對曰有嵩丘山去太室七十里此是寫書誤耳 案諸書並言太室少室總名嵩高山太室之外別無嵩邱唯中山經云少

室之山又東三十里曰泰室之山郭注少室云今在河南陽城縣西俗名泰室又注泰室云卽中嶽嵩高山也今在陽城縣西如郭氏說則賦蓋以少室爲太室以太室爲嵩高也潘郭同晉代人似可互證傅亮以爲寫書之誤恐不足據

恨賦

巡海右以送日注列子曰穆王駕八駿之乘乃西觀日所入案賦云送日用穆王事以喻始皇也注亦不誤然始皇固嘗有此事初學記引三齊略記云始皇作石橋欲過海看日出處有神驅石下海神輒鞭之石皆流血賦上句云方架鼃鼃以爲梁亦謂作橋

文賦

叩寂寞而求音注淮南子曰寂寞音之主也 文子自然篇曰故肅者形之君也而寂寞者音之主也此在淮南之前

洞簫賦

夔妃准法注尚書帝曰夔命汝典樂妃未詳也一云夔列子曰孔子就師襄學琴 案云夔當作襄賦下有師襄若分師襄磬襄爲二人則作襄不嫌複出說詳於下初學記玉海引此賦並作襄又初學記引琴操曰古琴曲有九引一曰烈女引楚樊妃作案夔與妃皆取能審音耳妃蓋謂樊妃

師襄嚴春不敢竄其巧兮注家語曰孔子學鼓琴於師襄

閻氏四書釋地云孔子在衛年五十九時學鼓琴於師襄子世家三曰師襄子與論語曰襄者自別一人且論語之襄乃魯伶官當未入海前豈容至衛俾孔子從之學乎銘案馬融長笛賦云夔襄比律又云磬襄弛懸李注上引家語下引論語則亦以爲二人

舞賦

眇般鼓則騰清眸注般鼓之舞載籍無文似舞人更遞蹈之而爲舞節 宋書樂志云鞞舞未詳所起然漢代已施於燕享矣傅毅張衡所賦皆其事也晉鞞舞哥五篇卽今之鞞扇舞也又晉初有柷槃舞史臣案柷槃今之齊世甯也張衡舞賦云歷七槃而縱躡顏延之云遞間關於槃扇皆以七槃爲舞也搜神記云晉太康中天下爲晉世甯舞矜手以接柷柝反覆之此則漢世有柝而晉加之以柷反覆之也案此柝與槃同則是舞者所執之器

長笛賦

長笛賦注周禮笙師掌教吹笛說文曰笛七孔長一尺四寸今人長笛是也 夢溪筆談云馬融所賦長笛空洞無底剡其上孔五孔一孔出其背正似今之尺八李善云七孔長一尺四寸此乃今之橫笛耳太常鼓吹部中謂之橫吹非融所賦者

特箭橐而莖立兮獨聆風於極危注箭橐二竹名也尙書曰惟箇籥楛鄭玄曰箇籥蒼頡篇曰聆聽也 案周禮橐人

職掌箭橐則橐非竹名此注誤戴凱之竹譜云箭竹高者不過一丈節間三尺堅勁中矢亦無橐竹尚書正義曰鄭云籥籥籥風也竹有二名或大小異籥籥是兩種竹也釋文云茵韋昭一名聆風竹譜云籥籥二竹亦皆中矢皮特黑澁然則賦實謂箭竹籥竹此注籥下脫聆風也三字

籥洞隕墜程表朱裏注說文曰程示也張晏漢書注曰表猶外也示當作品李注南都賦致飾程蠱引廣雅曰程示也此引說文因彼而誤賦文遂不可通說文曰程品也十髮爲程十段改一作一程爲分十分爲寸案賦二句言造爲笛孔之事上句謂既鑿之復磨之此句謂其孔之疏密高下皆有分寸度程而孔內又以朱飾之也洞簫賦云鏤鏤離灑

絳脣錯雜李注云絳脣謂簫孔以朱飾之與此二句同義

女媧制簧

注

宋均曰女媧黃帝臣也

禮記明堂位鄭注云

女媧承宓羲者正義曰春秋緯宓羲女媧神農爲三皇是承宓羲者帝王世紀云女媧氏風姓承庖犧制度始作笙簧蛇身人首是也銘案班固古今人表亦以女媧承宓羲黃帝臣別無女媧氏

暴辛爲墳

注

世本曰暴辛爲墳宋均曰暴辛周平王時諸侯

作墳有三孔風俗通云暴辛公作墳墳燒土也圍五寸半長三寸半有四孔其二通凡爲六孔詩正義引譙周古史考云古有墳篴尚矣周幽王時暴辛公善墳記者因以爲所作謬矣通典引宋均曰爲墳久矣此掌其官銘案呂

氏春秋古樂篇云僮作爲壘箎則非暴辛所作也此注三當作六有上脫久矣此掌其官六字

琴賦

飛龍鹿鳴注蔡邕琴操曰鹿鳴者周大臣之所作也王道衰

大臣知賢者幽隱故彈絃風諫 困學紀聞曰太史公謂

仁義凌遲鹿鳴刺焉鹿鳴在宵雅之首馬蔡以爲風刺蓋

齊魯韓三家之說全氏祖望曰太史公所傳當是魯詩中

郎寫石經用魯詩則所傳亦是魯詩

鷓鴣遊絃注遊絃未詳 初學記云琴歷曰琴曲有大遊小

遊又成公綏琴賦曰清飈因其流風兮游絃發其逸響御

覽引宋書曰戴永鼓琴其三調遊弦廣陵止息之流皆與

世異

猶有一切注漢書音義曰一切權時也 史記李斯傳云一

切逐客索隱云一切猶一例言切者譬若利刀之割一運

斤無不斷者解漢書爲權時義亦未得也

笙賦

況齊瑟與秦箏注風俗通曰箏蒙恬所造 風俗通云箏五

絃筑身也不知誰所作或曰秦蒙恬所造宋書樂志云箏

秦聲也傅元箏賦曰世以爲蒙恬所造今觀其體合法度

節究哀樂乃仁智之器豈亡國之臣所能關思哉

嘯賦

嘯賦注鄭玄毛詩箋曰嘯感口出聲也 封氏聞見錄云永

泰中大理評事孫廣著嘯旨一篇云其一本氣激於喉中而濁謂之言激于舌端而清謂之嘯嘯有十五章案詩箋云嘯感口出聲也成公綏嘯賦云動脣有曲發口成音而今之嘯者開口卷舌略無感舌當作口之法孫氏云激于舌端非動脣之謂也銘案今本嘯旨題云無名氏撰據封說則孫廣作也所言十五章十二法未必能合於古故不具載

節北里之奢注史記曰紂使師涓作淫聲北里之舞初

學記引梁元帝纂要曰古豔曲有北里

參譚雲屬注淮南子曰通古之風氣以貫譚萬物之理譚猶著也參譚不絕案參譚卽趨趨疊韻字也二字不當分

釋左思吳都賦云趨趨眩矚集韻二十二覃云趨趨走貌

高唐賦

立而熊經注如熊之在樹淮南精神訓曰熊經鳥伸又謬稱訓曰熊之好經夫有誰爲矜高注云經動導引各任自性非矜也後漢書方術傳華佗曰古之仙者爲導引之事熊經鴟顧章懷注云熊經若熊之攀枝自懸也莊子曰熊經鳥伸此引導之士養形之人也

正冥楚鳩注廣雅曰楚鳩一名嘑啁正冥無注疑是二鳥

名儀禮大射禮鄭注云正者正也亦鳥名齊魯之間名題肩爲正正鵠皆鳥之捷點者又說文鵠字注云鵠鵠廣韻六脂云小青雀也集韻鵠作瞑王氏廣雅疏證云鵠鳩灰

色無繡項陰則屏逐其匹晴則呼之語曰天將雨鳩逐婦
是也鷓鳩小於班鳩舍人謂之楚鳩水經注引廣志云楚
鳩一名嗶啁此注雅當作志嗶當作嗶

神女賦

則羅紈綺績盛文章注綺五色也蒼頡篇曰績似纂色赤
釋名云綺欵也其文欵邪不順經緯之縱橫也說文曰綺
文縉也段氏曰文者錯畫也縉爲遠道方文謂之綺又禮
記深衣篇鄭注云績畫文也李注景福殿賦引尙書鄭注
曰績讀曰繪凡畫者爲繪案尙書日月星辰山龍華蟲作
繪此賦所謂文章卽績畫之衣也

洛神賦

秣駟乎芝田注十洲記曰鍾山仙家耕田種芝草 郭憲洞
冥記曰東方朔遊結雲之地得神馬一疋帝問東方朔是
何獸也朔曰昔西王母乘雲光輦以適東王公之舍稅此
馬於芝田乃食芝田之草

悵猶豫而狐疑注爾雅曰猶如鹿此獸性多疑慮一曰隴西
俗謂犬子隨人行每預前待人不得又來迎候故言猶豫
也狐之爲獸其性多疑 王氏經義述聞曰猶豫雙聲字
也字或作猶與老子曰與兮若冬涉川猶兮若畏四鄰淮
南兵略篇云擊其猶豫陵其與與轉之則曰夷猶楚詞九
歌王注曰夷猶猶豫也曲禮曰決嫌疑定猶與狐疑與嫌
疑皆一聲之轉耳後人以爲狐性多疑猶是犬名又謂猶

獸名又以豫字從象而謂猶豫俱是多疑之獸以上諸說具見水經注顏氏家訓禮記正義及兩漢注文選注史記索隱等書夫雙聲之字本因聲以見義不求諸聲而求諸字固宜其說之多鑿也

攜漢濱之游女注毛詩曰漢有游女案賦上云南湘二妃謂湘水之神則此游女亦神女也南都賦云游女弄珠於漢臯之曲李注引韓詩外傳曰鄭交甫將南適楚遵彼漢臯臺下乃遇二女佩兩珠大如荆雞之卵此賦又云感交甫之棄言兮然事同意異於文無嫌也

歎匏瓜之無匹注史記曰四星在危南匏瓜阮瑀止慾賦曰傷匏瓜之無偶然無匹之義未詳其始隋志云匏瓜

五星主後宮則有婦女之象然未聞有匹如牽牛織女者故云無偶耳恐非有別義也

騰文魚以警乘注文魚有翅能飛西山經曰泰器之山觀水出焉是多文鰩魚狀如鯉魚魚身而鳥翼蒼文而白首赤喙常行西海遊於東海以夜飛其音如鸞雞

韋孟諷諫詩

肅肅我祖國自豕韋注左氏傳曰在商爲豕韋氏案漢書古今人表祖乙時有豕韋武丁時有劉姓豕韋左傳襄二十四年正義曰鄭語云祝融之後八姓大彭豕韋爲商伯矣又曰彭姓彭祖豕韋則商滅之矣亦不知殷之何王滅彭姓而封累後也銘案史記集解引賈逵曰豕韋武丁滅

之以劉累之後代之是豕韋有二竹書祖乙元年命彭伯
韋伯則與大彭為商伯者即韋伯也韋姓乃韋伯之後與
范氏祖劉姓豕韋無涉

王赧聽譖實絕我邦注應劭曰王赧周末王 容齋四筆云

周至赧王僅存七邑救亡不暇豈能絕侯邦乎杜預曰豕
韋殷末國於唐成王滅之此最可證銘案彭姓豕韋為武
丁所滅杜預言成王滅唐者乃劉姓豕韋不得取以為證
韋孟謂國絕於王赧不知何據然洪說亦非也說詳上文

巨希範侍宴樂遊苑送張徐州應詔詩

匪親孰為寄注史記田肯謂上曰非親子弟莫使王齊 何
氏讀書記云呂向注武帝弟宏為徐州刺史案詩中有匪

親孰為寄之語五臣是也銘案梁書張稷當作傳云齊永

明中為北徐州刺史據史稷與齊非親屬又案臨川靜王
宏傳云天監元年為都督揚南徐州諸軍事揚州刺史四
年都督北徐八州諸軍事至普通元年皆揚州刺史如故
並無徐州刺史之文南史本傳盡去其都督之職唯曰為
揚州刺史而已則向注不足據矣又范彥龍贈張徐州謨
詩邱范同時人則為送謨無疑蓋此語但言所寄之重耳
孫子荆征西官屬送於涉陽侯作詩

三命皆有極注鄭玄禮記注曰司命主督察三命 禮記祭

法正義引孝經援神契曰命有三科有受命以任慶有遭
命以謫暴有隨命以督行受命謂年壽也遭命謂行善而

遇凶也隨命謂隨其善惡而報之又白虎通壽命篇云有
壽命以保度有遭命以遇暴有隨命以應行習論衡命義
篇引傳曰說命有三一曰正命二曰隨命三曰遭命正命
謂本稟之自得吉也不假操行以求福而吉自至故曰正
命餘與前二說略同

咄嗟安可保注蒼頡篇曰咄啐也王弼周易注曰嗟憂歎之
辭野客叢書云劉貢父辨晉書石崇豆粥咄嗟爲誤石
林謂孫楚詩有咄嗟安可保之語咄嗟猶呼吸疑晉人一
時語耳竊謂此語自古而然非特晉也前漢書項羽意烏
猝嗟李奇注猝嗟猶咄嗟後漢何休注公羊曰噫咄嗟也
此明驗漢人語矣

顏延年秋胡詩

鳧藻馳目成注

班彪冀州賦曰感鳧藻以進樂兮

後漢書

杜詩傳曰士卒鳧藻注云言其和睦歡悅如鳧之戲于水

藻也

顏延年五君詠

仲容青雲器注

青雲言高遠也史記太史公曰非附青雲之

士惡能施於後代哉楊用修云史記青雲之士謂聖賢

立言傳世者孔子是也高方

當作京房

易占青雲所覆其下有

賢人隱梁孔稚圭隱居多構山泉衡陽王鈞往遊之圭曰
殿下處朱門遊紫闥詎得與山人交耶鈞曰身處朱門而
情遊滄海形入紫闥而意在青雲自宋人用青雲字於登

科詩中乃誤至今不改

文選拾遺卷四

三

文選拾遺卷四終

男文焯校





